

## Técnicas municipais de Brión e Nigrán apoian o desenvolvemento local en Cabo Verde

- Comezarán por realizar unha diagnose dos recursos agrícolas e ambientais do Municipio do Tarrafal, impartir formación e elaborar recomendacións
- O Fondo Galego de Cooperación e Solidariedade reforza as capacidades dos parceiros na África lusófona a través do programa Especialistas en Cooperar

Pontevedra, 1 de agosto de 2024. Dúas técnicas dos concellos de Brión e Nigrán desprazaranse o vindeiro luns a Cabo Verde para **colaborar durante tres semanas co Municipio do Tarrafal** a través do programa Especialistas en Cooperar, impulsado polo [Fondo Galego de Cooperación e Solidariedade](#). Ademais, persoal municipal de Lugo e Tomiño viaxará en 2025 a Mozambique para apoiar a xestión financeira de dous concellos.

O labor de Lola Landeira, axente de emprego e desenvolvemento local do Concello de Brión, e de Carla Pérez, xefa de brigada de incendios no Concello de Nigrán, estará encamiñado a promover un **desenvolvemento económico local sustentable e participativo** no Tarrafal, municipio duns 17.000 habitantes situado na Illa de Santiago. Trátase dun proxecto a catro anos que, nesta primeira fase, se centrará na **identificación dos recursos agrícolas e ambientais**, de aí que as tarefas a realizar pasen por analizar necesidades e potencialidades, impartir capacitacións ou elaborar recomendacións, tendo en conta o enfoque de xénero.

**Lola Landeira** agarda “achegar a experiencia de 25 anos traballando no desenvolvemento local en concellos rurais, polo tanto moi vinculada á agricultura e ás mulleres”. “Estou convencida de que esta experiencia me vai aportar novas perspectivas que me poden axudar no meu traballo como responsable de desenvolvemento local”, engade. A esta aprendizaxe mutua refírese tamén **Carla Pérez**, que foi seleccionada en calidade de técnica agrícola, pois decidiu presentar a súa candidatura para “poder traballar nunha realidade diferente con xente que vive noutro contexto, poder coñecer o que fan e como o fan, que precisan, que podo deixar e que me podo levar”. “Creo que é moi necesario saír da rutina”, conclúe.

**Unha ducia de traballadoras e traballadores de nove concellos** presentaron a súa candidatura para participar na [terceira edición](#) de Especialistas en Cooperar, tendo preferencia as administracións locais socias do Fondo Galego. Alén da formación e a experiencia, valorábase a vinculación co eido da cooperación e do desenvolvemento sostible. A iniciativa conta co financiamento da Agencia Española de Cooperación Internacional al Desarrollo (AECID), a través da Confederación de Fondos de Cooperación y Solidaridad.

### Cooperación técnica

A [cooperación técnica](#) é unha das ferramentas máis potentes e distintivas da cooperación internacional ao desenvolvemento impulsada polos gobernos locais, pois supón **aproveitar o know how dos municipios** para reforzar as capacidades das administracións públicas e asociacións das sociedades máis desfavorecidas, facilitando respostas profesionais e formación adecuada ás súas necesidades. Ese é precisamente o principal obxectivo de Especialistas en Cooperar, que tamén favorece o **intercambio de experiencias** e un maior coñecemento da realidade dos países que o Fondo Galego está a apoiar.

A través de Especialistas en Cooperar e mais do anterior programa de voluntariado internacional para persoal municipal, Vacacións con Traballo, desde o ano 2005 un total de **53 empregadas e empregados da administración local** teñen colaborado cos parceiros do Fondo Galego de Cooperación e Solidariedade en Nicaragua, Cuba, Perú, Mozambique e Cabo Verde, contribuíndo así á mellora da calidade de vida da poboación e xerando fluxos de coñecemento compartido. A reconfiguración do programa, que se retomou en 2022 tras ficar suspendido por mor da Covid-19, busca potenciar a súa dimensión de cooperación técnica no marco da Axenda 2030 e dos [Obxectivos de Desenvolvemento Sostible](#).

### O Fondo Galego

O Fondo Galego de Cooperación e Solidariedade está integrado por 112 concellos e as deputacións de Pontevedra, A Coruña e Lugo, que concentran a través desta rede os seus esforzos no eido da cooperación ao desenvolvemento. Garántese deste xeito unha xestión profesional e transparente, así como a realización de proxectos con impacto nos países do Sur Global e a sensibilización da sociedade galega a prol da solidariedade internacional. **Recoñecido como axencia municipal da cooperación galega**, o Fondo Galego vén de cumprir 25 anos tendo apoiado uns 200 proxectos en máis de trinta países e promovendo numerosas actividades e materiais en relación aos desequilibrios Norte-Sur e a Axenda 2030.